

# Nova schanza per giuvens e giuvnas ch'han gust da scriver!

DA FLAVIA HOBI

**D**api la finiziun da la gasetta da giuventetgna «Punts» na dat i betg pli ina plattafurma per giuvens Rumantschs nua ch'els avessan la pussaivladad da scriver tge ch'occupa els, opiniuns u simplamain istorgias or da lur mintgadi. Sch'ins resguarda che nos rumantsch è ina da las quatter linguas naziunalas qua en Svizra è quai detg trist – u betg!?

**N**us da la GiuRu (Giuventetgna Rumantscha) avain perquai lantschè in nov project ensemèn cun La Quotidiana. La finimira da quest project è ch'i vegn mintga emprim venderdi dal mais publictà ina pagina cun artitgels scrits da giuvens e giuvnas Rumantschas. Trametter pon ins ses text mintga giada fin ils 20 dal mais a l'adressa [flavia.hobi@bluewin.ch](mailto:flavia.hobi@bluewin.ch).

Saja quai intervistas, columnas, reportaschas en ils differents idioms – nus essan averts per tut. Sche quests artitgels vegnan anc accumulads d'in maletg u d'ina fotografia è quai anc meglier.

**I**gl è ina pitschna entschatta ch'ha anc grond potenzial da crescer. Ma perquai duvrain nus igl agid da tut ils giuvens e tut las giuvnas ch'han gust da scriver u era simplamain da trametter in maletg spezial cun ina curta descripsiun.

**I**fa grond plaschair da pudair preschentar en questa ediziun la premiera da nossa pagina «vuschs giuvnas». Jau giavisch bun divertiment ed en num da l'entira GiuRu ma legrel jau sin blers artitgels variants, interessants e divertents da vuschs giuvnas or da tut las regions!